

四庫全書

集部

欽定四庫全書

滎陽外史集卷四十四

明鄭真撰

闕

榮陽外史集卷四十四

欽定四庫全書

滎陽外史集卷四十五

明鄭真撰

碑銘

元故贈中憲大夫海道都漕運運糧副萬戶上

騎都尉追封高陽郡伯韓公墓碑

代作

國家著為定制凡官自七品以上得封贈父母迨至三品則及其祖父母所以為忠孝勸也乃至正二十有七

年秋七月今皇帝詔中外文武羣臣秩賚有差于是奉議大夫海道都漕運正萬戶既上官有司援例以為當封二代于是其祖妙心居士贈中憲大夫海道都漕運運糧副萬戶上騎都尉追封高陽郡伯祖母陸氏贈高陽郡君父封武德將軍溫台海運所千戶驃騎尉定海縣子惟善改封太中大夫海道都漕運正萬戶輕車都尉高陽郡侯母定海縣君朱氏改封高陽郡夫人命既下郡侯率其弟及其子姓錄副黃焚告于郡伯墓下既

而公服設褥位北望再拜禮畢徐言曰惟善不才忝承
先緒謗焉弱息獲備官使錫命之典賁及泉壤惟善亦
與有榮焉則皆我先公遺澤積累之所致也其可不昭
示來裔乃修書致幣奉江洲行樞密院副使天台羽庭
劉公所著妙心公墓銘來長汀山中俾某書其事于墓
道之碑公姓韓氏諱能字君厚後復即字為名妙心居
士則其號也世居慶元路定海縣西曾祖諱德昭祖諱
清之父諱祖亮皆韜光匿素不在仕籍曾祖妣陳氏祖

妣林氏妣李氏王氏公王氏出也公少有志操長克以勤儉活產業家用富饒天性孝友事二親溫清之節滌瀝之奉備盡其歡二弟以匱乏告厚給之至終其身海濱廣斥歲多水旱里民之飢者周之以粟寒者予之以衣死者給以衾棺商販者假以厚資貧不能償者弗問嘗出行聞哭聲甚哀公默計曰是必喪無斂具袖錕躬詣置諸几上謂其家人曰吾嘗逋負死者今償之爾惠施之及人徃徃類此家世奉佛其先考在日尤篤信阿

育王山藏釋迦真身舍利歲率其徒膜拜瞻禮示現者
及疾革將屬纊若有欲言者公侍左右問曰得非以蓮
社為意耶少差即為之卒有不諱亦不敢墜厥志父曰
果若是吾死庶瞑目且福汝矣既逝公奉喪如治命效
釋氏法奉遺殖瘞玉几山中在會者凡數百人庖饌告
勿給既宣揚秘呪就食者皆屬饜視甌釜尚有餘者或
有妄言不敬則相繼以死當時學佛者以公孝心純至
故感應之妙有如此者皆尊為妙心居士而不以字稱

之自是繙閱內典深契玄理凡佛舍之增葺金像之莊嚴治道塗駕橋梁傾囊發廩一無所靳晚得城東闕

徙居之當天下太平從容宴息文獻遺俗足為子孫依歸而公亦已老矣公生于至元十七年九月二日卒於至正二年四月二日享年六十有三以六年十一月二十九日葬於鄞縣陽堂鄉盛峯山之原娶陸氏名慶字德寧即高陽郡君有婦道始議昏時協夢于神公之家業有成者郡君實相之公既卒郡君菲衣食焚香梵

誦致永慕資冥福會公冢上產竹一本二幹者郡君曰
此吾合葬之兆也其死矣乎果得疾以終生于至元十
五年二月二十七日卒于至正十五年十二月二十八
日年七十有八以明年十二月二十七日祔葬于公之
兆子男二長惟善即高陽郡侯次可善女三長適胡允
文次適馮元晟次適應可立孫男五懋簡懋和伯瑛伯
璋伯珪女五曾孫男二中庸女二懋和以郡侯次子始以
材請受知荊省丞相薦諸朝署忠翊校尉慶元紹興等

處海運所千戶以功陞僉制東道宣慰使司都元帥府
事散官如故再轉奉議大夫海道都漕運糧副萬戶今
陞為正萬戶佩雙珠虎符階則太中大夫其推恩祖父
實一鄉榮觀云夫賢者之報不必在身大夫之家則知
尊祖以公積德行義貽其子孫者如此則夫身歿之後
所以追錫而寵綏者不為過矣郡侯克廣已成之業踰
六十年親見其子榮爵之盛而其異日寔窆之事必依
祔先域使夫一世再世至無窮焉則所以光昭先德而

侈大君之賜者當有大書不一書者矣傳曰積善之家
必有餘慶于韓氏見之莊自京師歸佐淞閫辱交郡公
父子知公為詳而羽庭劉先生之文又有可徵者其敢
以老病不文為辭銘曰於皇聖元廣孝錫類爵秩疏榮
以古之制侃侃韓公勵行恪勤不有其位今終厥身燕
及孫謀亨衢接武推本教忠惟祖惟父生歿顯榮乃贈
乃封實大聲宏德厚報豐相而新阡蒼蒼松栢泉石輝
光龍章有赫爾子爾孫望拜闕廷精爽不昧式克欽承

奕奕慶門尚其善積裒裒公侯百歲一日文臣勒石鋪
揚王休冀諸來者眎此巖幽

宋故光祿大夫建安郡開國朱公神道碑銘

宋故太師文公晦庵先生五世孫烜謫居潁上訓導縣
學以書致其高大父光祿公之狀來濠梁謂滎陽鄭真
曰烜忝系儒宗先文公立言垂訓天下家傳人誦亦既
列諸從祀載之史冊矣而烜高大父光祿公以文公季
子式克欽承以至于今佩祚不絕墓上之石燬于兵燹

久未復舊先考員外嘗垂志于此不及遂以歿遺言所屬在我後人子為撰次其略所幸遂南還勒諸隧道異日見祖宗地下庶幾有以藉口矣真惟大賢之門道學淵源如長江巨海豈末學小子所能窺測再拜復書以辭所復使來言曰吾計已託諸子矣無讓按狀如左公諱在字敬之姓朱氏其先在唐時有名仁軌者與其弟敬則居亳州永城縣敬則仕唐為宰相仁軌之後諱古僚者以陶雅員半千之命總卒三千戍蔽之婺源因家

馬曾祖諱森字

闕

贈承事郎祖諱松字喬年登宋宣

和

闕

進士第授建之政和縣尉祿養其父承事公卒

服闋調延平尤溪縣尉改監泉州晉江縣鎮召試館職
除正字遷吏部郎官與時相秦檜議不叶屢求祠祿出
知饒州嘗與豫章羅仲素講求河洛之學謂辨急害道
取佩韋之義號曰韋齋有文集若干卷以紹興某年某
月某日卒于建陽縣年四十有七贈通議大夫有至正
辛丑閏憲請諡南宮太常博士河東張翥臨川危素議曰

立人之朝風節彌高晚安祠祿不慕浮榮篤生令子為千
萬世儒學之宗宜褒贈以宣文化請謚曰獻靖而天官
定為公爵遂封越國公考諱熹字元晦文公晦庵先生
也以建炎某年某月庚戌望日獻靖尉尤溪時生而是
夕新安井騰虹采年十有四獻靖知饒州病亟命師事
劉草堂勉之胡籍溪憲劉屏山子翬既冠而字屏山以
顏子之學期之年十八舉進士雖中春闈為泉州同安
縣主簿赴任道經延平始學于李侗愿中以斯道為己

任歷事高孝光寧四朝仕于外者九考授祠祿三十六
多以去就不合于理固辭不起在朝僅四十九日蓋君
子小人勢有不兩立者以祕閣修撰致仕慶元六年三
月初九日卒年七十有一贈太師封信國公改封徽國
公賜謚曰文有元至正辛卯改封齊國公所著書有易
本義啟蒙著卦考誤詩集傳大學中庸章句或問論語
孟子集註太極圖通書西銘解楚辭集註辨證韓文考
異大全集門人問答語錄所編次有論孟集議孟子指

要中庸輯畧孝經刊誤小學書通鑑綱目宋名臣言行

錄家禮近思錄程氏遺書伊洛淵源錄儀禮通解共若干

卷行于世曾祖妣

闕氏

贈

闕

人祖妣祝氏贈

闕

人元封

越國公夫人妣劉氏草堂之女先文公卒維祝氏俱徽

國公夫人元追封齊國公夫人公

闕

出夫人也幼承先

訓力勤不懈文公既沒撫手澤遺書慨然曰斯文命脈

盡有在是矣探討紬繹至忘寢食故性理之淵微文字

之浩博天地鬼神之奧禮樂制度之詳人事之得失政

治之理亂靡不精熟由科第臺閣出守信表平江三大
郡以治狀聞召入歷拜工吏侍郎時理宗以文屬入繼
大統終始崇獎正學以公為文公子尤所眷厚公嘗入
對內殿論人主學問之要帝曰先卿中庸序言甚詳朕
讀之不釋手恨不與之同時也初文公生于尤溪官舍
後以為南溪書院祀獻靖以文公配及文公寓建陽之
考亭四方從遊者眾架屋百十間居之號竹林精舍繼
改滄洲至帝在御勅賜考亭書院親洒宸翰書額以賜

馬公上有二兄長諱塾字

闕

嘗從東萊呂先生遊先

文公十年卒後贈中散大夫次諱埜字受之戶部監酒
退隱家居亦先卒獨公從容晚節年七十有一而終同
于文公云公生於某年某月某日卒于某年某月某日
以某年某月某日葬公先墓在新安號文公闕里從事
葬建之政和獻靖葬崇安文公葬建陽之嘉禾上里至
公遂葬建城東門外光祿坊皇華山之麓公娶呂氏東
萊成公女維娶黃巖西橋趙氏復娶武林方氏俱封夫人

子一人鑄字子顏以蔭授出身仕至朝請大夫湖南運使以元至元丙子某月某日卒年六十有一娶劉氏封夫人孫沆字端凝元初以世澤為將仕郎邵路建寧縣主簿某年某月某日卒年五十有四娶周氏延祐戊午八月二十一日卒年七十有八沆子五人曰某殤卒曰栢字正甫不娶延祐庚申某月某日卒曰樺字仁甫號雲澗生于至元丙子正月六日適元兵南下亂離之際既長知學而家事艱難上奉二親下撫諸弟年三十有

九以薦授汀州儒學正借注海北警曹雷州遂溪縣潭
州寨巡檢升漳州路儒學教授天歷戊辰十二月十日
卒贈承務郎江淞等處行中書省左右司員外郎娶倪
氏至治癸亥八月七日卒

闕

十有五贈

恭人曰械字茂甫隱居不仕至正丁酉十一月十八日
卒曰棖字正甫延祐丁巳某月某日卒娶

闕

氏于光祿

公為曾孫皆不逮事公矣棖子一人即所也棖子三人
櫟字三觀年五十一而卒嵒字明忠年五十二而卒光

字明凱際今大明任平涼府

闕

縣主簿于光祿為玄

孫至是蓋四世矣所二子坻年三十二而卒境早殤今
無子自朝請以下至所之子皆祔葬光祿公墓生沒歲
月用牽聯書之使有考焉失于記憶者不悉書也所字
明仲讀書有氣節嘗兩為學官升福建江西省掾慨念
先世欲一振起之在元至順間朝廷將改封文公命禮
官集議以為文之一字理不可易第徽以本鄉宜封大
國以致崇德報功之意定為齊國而未下至正辛卯所

適在京始覆議付秦事曹又十年所復至京中書遂奏
遣使奉制并上樽內醢禮物祭告家廟越二年而獻靖
越國之封至矣所之光紹前列如此真竊惟道之太原
出于天而係于人先聖孔子集羣聖之大成先師文公集
羣賢之大成文公不可尚已光祿公以文公家庭授受
之正奮身科第踐揚中外上承帝眷蔚為名臣委慶緒
餘綿及累世而所以謀模畫諾從事藩省際今內附猶
以老成耆碩為學者師表君子於是知大賢之有後矣

然而暮景駭尋眇在淮潁之上慨念皇華山之陽雲深
木寒先兆魂魄之藏蓋百數十年于茲矣衣冠出遊儼然
如在孝思德報之情何如哉傳曰盛德必百世祀若光
祿公之澤信未艾也為之銘曰大道之行如日麗天泰
運肇開篤生英賢於惟考亭學沂鄒魯往行前言會其
統緒侃侃光祿是謹是承名父有子文獻足徵迺登名
科迺揚顯要從素清班毋煩訓誥于時理皇龍飛乘乾
燕閒穆清廣廈細毡公入內廷從容勞問獻納論思唯

公是聽公歸徐徐玉佩瓊琚奉身歸全不昧厥初遺表
上聞帝心是惻開國勲封以贈以卹公既遠矣逮于孫
玄周旋恪恭世賞是延時異事殊繫名謫籍俛仰古今
百年一日故山峩峩窳窳祔依封之殖之式迨其歸返
本廸原前規後矩告爾來葉繩祖之武

初明仲求著此文約以歸閩南質諸家譜填歲月名
諱封贈然後上石後明仲死濠上此本在朱良初處良
初文公
遠族也

黎氏重建祠堂碑


禮曰君子將營宮室宗廟為先宗廟所以寓誠敬也三代以還定為廟制自天子至于官師視其上下以為孝差至漢有易為祠堂者考亭朱子家禮于其制度詳矣今士大夫家用之顧于門堂寢室或不能盡合焉者有能因人情而為之節文尸而祝之其非有得於制禮者本意哉惟廣東黎氏遂有今緒粵在高陽氏命南正重司天火正黎司地子孫因之以字為氏當宋高宗南渡有諱獻臣者自贛遷惠居博羅之白沙治三禮致身通顯

晚知雷州以文學政事有聲其後諱宿者遷東莞之湟
溪豐于產業敦尚行義尤好施與鄉里化之族日以大
諱弼者至孝奉親朝廷嘗表其門署其里曰德本因建
祠里門之東以奉先祀有田以為經費又于祠西建義
塾延師教族之子弟凡先世誥勅之在白沙者盡得而
藏之宋德祐末祠與義塾燬于兵元至元癸巳興復如
故又至正乙未復罹兵燹遂為草莽之墟矣際今聖朝
治教並興黎氏族黨追念本始廼洪武庚戌之歲再復

義塾闢祭田修祀事其中而權宜草創者踰年卒成之
歲時享祭煮蒿悽愴降灌燎瘞禮無不備合族子姓幾
六七十人睦婣之義遠邇所稱宋元以來為教官為邑
宰者比比有之國家徵用儒宿十世孫光起家監察御
史君子于此有以知世澤之厚矣會御史公巡歷中都
真以非才忝教臨淮以斯文禮見俾書其事于石夫禮
有合祭之文蓋追遠尊先事亡如存固孝子慈孫所當
致力者非有閔恤之地神而明之其何以通幽顯而無

間哉黎氏自雷州府君肇始官闕昭穆祠世世承傳自
南渡至今薦更事故廢而輒興誠敬之心百年一日豈
但春秋享薦如見其笑貌聞其容聲而已耶今御史上
承天子耳目之寄繡斧所至風采凜然異日推本教忠
疏封泉隧其祀事儀等又將增益而侈大之矣詩曰
永言孝思孝思維則黎氏子孫尚引而不替以延裕於無
窮哉真既備著其本末復系之以詩曰南廣海寓文獻
攸聚有聞厥家孔樂斯土樂土是營宗事以承奕奕新

祠神樓宴寧泰牲告碩以侑酒食孝享苾芬惟禮是式
至陰冥冥格享欣欣工祝致告嘉爾後人後人多祉出
司憲紀冠豸高義皇華使指慶門煌煌祖考之光時其
烝嘗永禋勿忘



榮陽外史集卷四十五

欽定四庫全書

集部

榮陽外史集卷四十六

詳校官編修_臣翟槐

中書_臣劉源溥覆勘

總校官降調編修_臣倉聖脉

校對官編修_臣張燾

謄錄監生_臣吳岐山

欽定四庫全書

榮陽外史集卷四十六

明鄭真撰

傳

遂初老人傳

遂初老人姓王氏名厚孫字叔載王為瑯琊著姓其先
在宋居開封祥符高祖保信軍承宣使安道扈從南渡
始家于鄆曾祖撫吏部郎中崇政殿說書祖應麟號厚

齋先生中寶祐博學宏詞科歷事三朝典誥冊命皆出其手官翰林學士禮部尚書父昌世承務郎世稱為承奉公老人生於元大德庚子十二月一日距今明洪武之壬子年七十有三謂人曰天地生人之初吾不得而知也可知者理而已理之在人初何嘗不善克遂其初足矣吾幸以世家子持身律已實拳拳焉今耄矣其庶幾乎迺自號遂初老人云老人在幼知學八歲詩成四韻讀書日記數百言十歲已竟論孟詩書禮記皆成誦

并閱尚書深寧集習書義兼詞賦操筆立就鄉先生王
僉判叔蘇趙太社孟何戴教授表元聞其異就見焉科
制行改治詩經蓋東南詩學以明郡首稱舒文靖璘傳
李國博元白王於舒李世親具得其源委時四方承平
文物殷盛承奉公守先訓弗仕登門皆老成博雅老人
日侍左右面命心傳充積溥洽由是熟於性理治道禮
樂法制及臺閣職官典故世胄譜牒鄉里欲言其祖者
多咨問之袁文清公桷受業尚書後自翰林歸里第輒

問所學老人對曰近於濂洛關輔建安西蜀諸書稍已
通習惟讀書記衍義正宗意有所得以其明潔整密有
成法易知而可守也因言世之學者涉獵朱子如干卷
書自謂得其真傳且譏議淳熙諸老不知諸老與朱子
同時言論雖不盡合而博聞實踐為朱子推許今人耳
目所不及迺藉口性理以自文其寡陋高談濶視漸成
虛誕之風先生達尊宜懲其弊以新士習文清著四明
志命老人分撰二考且言子家世太史亦究意否老人

曰經與史同出而異名古有編年司馬氏為紀傳隋志
始稱正史非古也作史必曰三長年代協體統之會人
物萃品類之歸叙事由顛至末不為詳修辭以一當十
不為簡彼諛聞臆見雜見衆手舛訛遺漏欲以傳信久
遠難矣因舉累代高下得失甚備文清為屬耳復閱其
郡庠試中程文閭府表稿作而嘆曰先師之道茲不墜
矣門下老客得見繼祖之盛何幸哉金華黃文憲公潛
嘗三至鄞其曾祖朝請夢災視吏部為座主謂叔載余

兄弟行假宿細論因為誌承奉公墓也其始也躬草剡
薦為郡學訓導而帥府都事曹愚僉憲孫揖郡守郭侑
同為勸引老人累辭不獲至則開說名理辨析疑難請
業者頃刻數十篇諸生皆悅服老人既以師法傳庠序
嗣後二十餘年蠡吾王元恭鴻吉哩氏安圖公相望來
守親詣門屈致之前後與同列者程先生端禮鄭先生
奕夫胡先生世佐應先生奎翁皆氣類訢合座以下材
藝稱者也有其人朔望講義往時就章立題率一篇而

止老人病其拘取四書五經闕世教者質以已意為之
直說抑揚反覆音吐洪暢聞者竦服老人三試泐聞不
偶嘆曰得失有命苦心求售奚益用詞學十二體為古
文根柢三代兩漢博以唐宋諸名家屬詞平順絕去雕
巧富人奉禮幣招為師力辭不就陵陽年應復都司泐
東論年家契力招致教其子屈行輩敬憚之台彥博侍
憲副曹某來慮囚謂叔載文行宜為學官憲副即署郡
直學老人以不任煩瑣辭牟都司曰先儒謂錢穀亦為

已之學聖人辭尊居卑乃就職與吏輩不合拂衣去李
僉憲綱強起之塗田在鄞砂岸在昌岸在昌國為豪民
侵奪力陳其事皆得復原粟有贏例歸職掌老人獨輸
於公會大修廟學請于郡守俾通吏事廉幹者司之遂
得與諸儒專論名教事教授陳先生廷言始與定交秩
滿授象山教諭尚書富于著述王海最為詳洽然未脫
業失而復得多闕誤老人考訂編次請帥府鋟梓并他
書十二種以傳表文清所撰四明志或有譏於僉憲沙

木斯鼎毀其板老人白之王太守元恭曰袁公中朝名臣書法高古不可毀也太守持書以進僉憲驚悔命與舊志並行屬老人成績志若干卷四明自宋紹興間有鄉飲酒禮其後寢廢歲首僅序拜于學程先生請王太守復其禮屬老人與鄭先生某考訂一遵儀禮用賓興歲行之搢紳韋布周旋者每千餘人經費田為吉祥寺僧所據老人與鄭先生白諸有司僧乃市負郭田歸我歲積粟餘置庄一所象山學久失教養老人設主善為

文會以興士習租粟數百石每患逋負迺精加考覈倉廩充足欲漁取者志不敢逞蔣景武中鄉選送宴津遣慨然當之以郡檄歸校王海諸書調婺州浦江教授甫逾閏月即解官歸養母楊氏無祿任意適朝廷遣大臣李國鳳經略江南以便宜用遺逸既至鄞有司以老人名上李曰此危太朴所深敬者署衢州儒學教授而中書復用薦者除邵武路教授福建分省又陞為副提舉皆不赴惟期內外無媿以待歸全而已老人天性質直

尤清苦介特日用服食隨其所有娶史氏系出相門有
賢行盡斥其粧具為公家費承順父母惟意所與疾則
盡心調治藥必親製煎煮至愈乃已在弟姪子孫皆然
姑適史萬卿貧歸養之嫁其女而葬其夫從兄震祖死
其子在他方棺殮葬之士友蔣宗簡以死托率先勸財
葬以禮求鴻文以誌妹適楊氏以疾歸母家調治八年
而卒一子侃早孤撫教成人侃亦篤於舅奉祭祀保墳
墓凜如不勝親故相依館穀之或以匱告假貸不吝弗

償亦不問患難救禦猶已事有過則面折無隱品別人之賢否不以勢位高下為輕重不以待遇厚薄為是非送死厚于奉生恤小篤于事大報德重于念惡勇退急于趨進或有侵其產業恃强凌辱設計傾危造謗損譽者則曰犯而不校其重義輕利處常順變多此類晚年詩酒娛樂客至談宋李事疊疊不倦且及至正史官詮次弗當欲為釐正尤極論奉化陳桎續通鑑前後之失所著多名言有遂初藁三十卷嘗戒其子陞與隲曰承

家不在名利而在于不失身敬身不在外貌表襮而在
于毋自欺讀書當貫古今處世必審進退其有同流合
汙以為通矯時干譽以為高患得患失以終其身者此
吾所深戒亦非所望于爾等也嗚呼敬之哉二子奉教
不敢失墜老人有弟名寧孫通春秋詩二經先世手澤
悉能記誦其亡也遺命與老人葬同兆域友于之誼蓋
始終弗忘者寧孫無子隲為後云

滎陽生鄭真曰伏觀前代儒學之盛莫過於宋東萊呂

氏先生西山真先生雖以宏博顯實廣道學之傳厚齋尚書於二先生沂流承源故於性理制度文章實兼諸子之長世之論四明之學者徒知祖陸氏而宗袁楊而不知言紫陽朱夫子之學者實始於尚書也尚書既歿遺書舊藁老人既服膺弗忘而又師友遺老名儒其言其行實足以膺黼黻謀猷之任然以心處退讓終不克大其設施惜哉世運推移丘園肥遯而老成典刑藹然為鄉邦後學模範有以學問之無窮命分之素定精思

力踐以遂其初者矣贊曰

古學傳宗曰惟四明文獻世美斯為可徵偉哉老人克
廣先緒發言成文本乎鄒魯貌彼來學辨說紛非不有
先覺孰其依歸道非難行時或我舍安命樂天浮榮何
假渾乎粹真曰遂其初威儀冠裳繫德之符洛社耆英
往古同傳申以贊辭有侈其踐洪武五年十一月十有
六日

駒一日謁遂初王先生從容慰藉甚歡因指几格上

一小軸謂曰此爾弟為我所作遂初老人傳且言鄉之學士大夫知我者莫如爾父爾兄弟能繼父志亦能粗知我者爾復為我寫一通以來庶幾見兩家契誼之厚退念先生與先人生同年學同業其相好為至篤先人不幸僅獲中壽以歿先生狀其行治而使傳載之吾兄弟之事先生如事吾先人焉既承命不敢辭先生方膺期頤之壽承文獻之懿問學淵博操履篤誠傳以傳之非得顯榮在上而名文詞者不可

顧吾兄弟何人而能模寫其一二乎雖然此傳序述
大抵皆常所親見質以平日先人所稱又撫諸門生
弟子之善言先生者一言一語寧有虛褒溢美則吾
兄弟之執筆可謂無愧而未始以顯微工拙論也以
駒兄弟頗繼先志而能知先生至於心術所獨得冲
澹夷曠以遂古初則又非淺識之所能盡知也先生
家世如此文行如此聲譽又如此世之人知先生者
豈獨吾兄弟哉觀於此必不以字畫之拙惡而廢吾

兄弟之言為可信也

大隱處士傳

大隱處士姓洪氏名夢良字瑞卿系出共工氏之後至宋南渡尤號為盛在丹陽者名興祖紹興中召試館職在鄱陽者名皓以禮部尚書使金不屈其子适遵邁並中詞科入翰林位兩府在天目者名咨夔仕至端明殿學士二子勲燾皆有才名處士之先相傳本於鄱陽曾祖樟為湖南宣撫使樟生子文子文生正之正之太學

生釋褐授承直郎宋社既墟絕口不言仕進處士其子也處士家大隱後徙居餘姚上林大隱在慈溪縣南為四皓黃公之里山高谷深良田廣畝犬牙參錯慶歷中鄉先生楊適道德聞望師表後進太守錢公輔薦之朝不起學者尊之曰大隱先生處士以鄉里之舊往來其間慨然以不及見先生為恨因號大隱處士以誌景仰不忘之意云處士天性剛直而溫和柔恭待人接物各適其宜婚喪祭祀先事備具而以誠敬將之宗姻賓客

歲時過從姁姁相樂時四方承平世家子弟多以攀附致顯榮處士獨慨然曰士豈以爵祿為榮也耶立身行已垂裕後昆斯亦可矣中年喪偶畫錦樓氏故宋參政鏞之後慕處士之賢招為子婿處士亦愛其文獻遺俗挈家附近勤儉取足年七十有九衰病日亟謂二子曰吾嘗恐墜失先緒以遺身羞今有子若孫居足以庇風雨田足以給食飲衣衾棺槨之備足以容身大命近止吾其死矣復何憾哉奄然而逝至正辛丑九月二十五

日也鄞縣通遠鄉錢奧實龍虎蟄藏之地卜葬得吉將
庀工風雨晦冥窆穴則天日晴霽啓殯大風飛雪如掌
執紼者皆股栗暨輦車登舟風雪為止覺晴煦和暢薤
歌載道窀穸之事固不如禮既歸祔主而微雨露潤送
葬者以為處士積善之報焉處士有子二人長炳以部
使者薦為游龍縣儒學教諭次寔才行自晦天台劉仁
本深加器重署浙省從事今居淮水上論先後天之學
占吉凶如前知人謂處士有子云

滎陽鄭氏曰予讀四明郡史厚齋王公著大隱楊先生傳於其道德行義備矣處士尚志先烈年逾耄耄委質從化而天復彰顯之斯所謂隱君子者乎贊曰

大隱之陽世有哲人高風凜然霜空秋旻卓哉處士尚論百世反求諸心克警克勵老矣歸全完而山川至理弗妄格于幽玄堂構貽謀曰有嗣子善贊善述世有良史

郭進士傳

郭進士諱可學即諱為字明州鄞縣人也家世業儒在

宋時有入中書掌外制者游經兵燹文行不槩見其後
名溥字子通者治尚書善詩文鄉先生慈溪嚴某妻之
以女二子長名可立次則進士也子通以部使者薦分
教處州青田縣復署上虞縣儒學教諭未上而卒進士
與其兄俱在幼母嚴氏守死自誓嘗涕泣指進士兄弟
謂人曰吾未亡人所賴以亢郭氏者其在茲乎躬紡績
資之使學李允中館授同里倪氏進士與其兄挾冊從
遊允中訓導郡庠進士復居座下是時鄉之耆文碩獻

多有其人進士遍登其門復取父書窮晝夜習之學遂以成為文章累積編帙出示其友多稱許之間受大家聘幣為其弟子師心所弗樂也家素貧亦力田十餘畝歲釀酒二十斛得什一之利以自給西遊浙江省憲論薦署為學官以時方阻兵不就而歸值其母喪考禮送終求信筆著傳紀其母之節縉紳士大夫復為詩辭挽此君子以進士能盡人子之道矣服闋家居杜門求志若將終身明洪武之三年聖天子下詔復進士科明年

有旨三年疊試復大徵儒士暨山林遺逸明郡有司以
名上者凡百餘人進士累辭獲免又明年壬子秋試敦
迫再三進士遂以書經薦浙省考官姑蘇魏俊民永嘉
孔克表會稽錢宰嘉興貝瓊共稱其文置在四十名之
列是冬計偕京師明有司歌鹿鳴勸駕逾年癸丑春過
浙省入謝知貢舉官徐叅政某命賦甘露等詩甚見稱
賞謁選天官大宗伯而下見進士長身骯髒將奏為在
京官弗果既而同年進士有以弗能任事辭者衆議以

中立府國家興旺之地中都肇建四方視為取則師儒之職盡使諸進士為之於是淞江八人同授中立府屬縣教諭而進士得在宿州之靈壁淮北當兵革之餘教席虛曠少衣冠之士舊家長老聞進士至出郊遠迓皆矜喜德色為設亭具進士亦不敢辭也然進士南產終不樂其風土又念母嚴氏葬地卑濕詣中立府援例乞歸改窆不許得家信知少女且死遂遇滯下疾既亟謂其友張克忠曰吾讀書二十年今年三十有八至於是

而死於是也耶遂卒是年十月十日也靈壁縣丞盧某
來主喪事克忠歸襚訓導丁繼先致衣服知縣郁仁以
槐簡殉以是月某日葬縣之西鄙縣人以其俗剪紙錢
狀若幡幢導迎柩車者凡四十餘縣長貳以下及其父
老里長諸生皆割牲以祭流涕被面執紼至墓所窆
深固畢事而歸雨下如注人為致其思云前淝東閫帥
趙宜訥謫居濠梁嘗友進士至是聞訃悵然曰可學官
不稱其志死誠可惜然靈壁之民長者何其能用情也

耶傳曰慎終追遠民德歸厚矣信矣哉進士娶徐氏有子一人方五歲贊曰

朝廷以科目取士士明一經克預其選者功名祿位取榮一時然施之政事不勝任者多矣若進士官為師儒以道自任一邑上下皆重為敬禮不幸而歿祭葬之哀慕之進士其何憾矣乎

頃予以使命過靈璧邑長以下出迓道左因得幸與

丁繼先張克忠

闕

卜仲祥諸君子相識皆予同

年進士可學友也是夕諸君子訪予所寓勞以酒饌
且以進士不可得見矣得見先生誠為喜幸而益增
故人九泉之悲也翼日共出而往詣進士墓為之一
慟既歸慨念諸君子死生之誼有如此者昔昌黎韓
公著歐陽生詹哀詞以寄清河崔羣彭城劉伉伉喜
古文羣蓋哀詹不得志以死者故公於是時致拳拳
焉今進士卒於教職無暮功近親之助諸君子乃克
盡其情焉足以見厚之至矣予向為進士立傳既備

著之因書二通以寄繼先克忠言辭淺陋不敢竊比
古人庶幾於不沒人之善者諸君子幸即是觀之老
懶不能悉書也

陳剛小傳

陳剛字子浩明州鄞縣人世居慈溪昭義里以農商為
業剛少好讀書因去習吏事見有舞文法喪心術者嫉
其所為投筆棄去與甬東傅恕就白衣僧舍借榻用程
氏讀書法誓以科業自見嘗挾冊遊郡庠始閱月其父

母以家貧復使習吏資以為養剛堅志不從因開門授
徒復去受春秋經於林淵淵所輯春秋四傳號為詳備
而於左氏先經始事後經終義尤拳拳焉剛復習是經
露抄雪纂不少怠天台許廣大以進士出身來為鄞縣
尹倡文會作興士類剛多在選列自是庠序之間籍籍
有聲大家巨室往往招致教其子弟知奉化州事李樞
亦嘗聘為諸生楷式退處家居忍貧蔬食間以醫藥為
濟人利物之具其父母暨伯父先後告終剛拮据喪事

買地以葬好義者多賻助之至行焯著縉紳鄉黨皆為
疎異然剛性雅尚所學日進終不一踐場屋會天下入
令職方聖天子下詔新學校貢舉法於是剛復受知定
海縣事姓某聘幣為訓導洪武庚戌之秋復以郡太守
命敦迫就試泐省以弗肯少屈有司繩墨不在選列明
年奉旨預徵京師羣試吏部中選授知神木縣事賜紗
帽綺衣銀束帶拜恩奉天殿下神木延安府葭州屬邑
控西北通與青海為隣宋時西帥經略之地剛徒步上

任歷數千里不以為勞所過用武闢要荒榛故壘弔古
徘徊悲歌慷慨縣值兵革之餘連歲饑饉民人稀少牧
馬往來鈔掠以文墨執事於官者率不循法檢剛列官
撫視疲羸民思復業姦胥猾吏痛以律懲治之黨與咸
懼謀引賊入寇時官軍方屯葭州遠不相及剛倉皇備
禦猝遇石山子有白敬臣者素號險黠舊嘗在軍職得
隸籍為民役充弓手剛嘗譴而杖之至是與其徒劉繼
宣挾刃逼令降賊剛曰汝果致賊為逆耶吾與此邑同

存亡恨不寸斬汝等敬臣令繼宣奪剛所佩邑印殺而
棄諸岩谷縣吳輔在京師時與剛同受命義如兄弟率
兵欲援走憩石穴見石刻言宋時有人避難者被兵焚
死為之惘然出宿蕭寺賊至其下力戰手刃數人遂得
脫後如葭州謁州守張木訥二人同夕見剛夢寐中適
朝廷命將討賊造舟踰日而就渡河盡殄滅之咸誇其
神速庶以慰剛之靈云神木存罹瘡殘井邑為墟主簿
王啓宗未到官實封上言縣治遂不復置啓宗與剛同

里閭久留葭州遺民往往自賊中來言因得狀剛死事
吳人金文徵山陰王原皆為論著以剛進思盡忠殆古
所謂死封疆者耶贊曰

四明多篤行文學之士縉紳士大夫稱之晚節以明經
授列者剛及傅恕庶幾焉聖運肇興之二人者皆能以
功業表著於世可謂逢時也已然恕以瘐死剛以寇死
士君子於此可以考其人矣哉

上虞王氏五老傳

昔亞聖鄉國公論天下之達尊三而齒居其一故周以
伯夷太公為二老漢以董公為三老至於夏黃公綺里
季東園角里及夫桓榮之流或稱四皓或稱五更皆所
以尊重而優之也夫人情莫不欲壽求之一鄉亦罕矣
况五老萃於一門者乎作上虞王氏五老傳上虞王氏
為周子晉之後世家瑯琊其居上虞不知所自始上虞
為越屬邑包絡山海廣袤二百里餘民淳俗厚王氏世
家詩禮多以眉壽稱有名某者生子五人長幼均年九

十歲次二曰均盛年八十

闕

歲次三曰均禮少均盛

闕

歲次四曰均賢次五曰均德均賢少均禮

闕

歲均德少均

賢

闕

歲此五人者皆皓首龐眉朱顏白髮衣冠杖屨從

容步趨鄉黨見者肅瞻敬仰每值所生辰輒奉觴稱壽

以為廣成子之流焉均禮之孫名

闕

字處仁颺言於衆

曰保令終而躋遐者在一鄉羣姓中求之實難昔香山

九老叙其事者白居易也睢陽五老叙其事者錢明逸

也洛社耆英凡十有三人則丞相司馬光叙之此羣姓

之萃於一鄉者也宋既南渡四明史氏號為至盛淳熙間丞相越王歸里與五兄弟五人為其女兄陳夫人為壽繪為六老圖參政樓宣獻鑰執筆敘述誇詡炫耀此同姓之萃於一門者也上虞去睢陽洛社為遠而與四明為同壤王氏一門同氣之盛庶幾史氏矣乎雖勲名爵祿有弗能及而道德風範有可傳者世之君子豈以顯晦論人物哉於是圖諸縑素縉紳士大夫咸為歌詩同邑夏時為之序引以為五老降福之厚如此尚論王

道者其有得於茲焉

滎陽外史曰物類之為祥也尚矣在天則有景星甘露
慶雲在地則有醴泉嘉禾芝草連理麟鳳則羽毛之祥
龜龍則鱗介之祥也至於耆年碩德躋仁壽之域則人
為之祥夫物之祥豈若人之為祥哉五老聚一家歷兩
朝沂其始生至於終老皆在太平盛際豈非天地樂育
之盛國家治安之徵乎今天子隆養老之禮四輔之職
比諸公孤若王氏五老者吾見上膺天寵三壽作朋如

岡如陵者矣贊曰

洪範箕疇壽為五福惟天之命惟人所欲煌煌五老有弟有昆道德輝光萃於一門逍遙冠裳從容几杖清風穆如有儀可象維時唐虞春臺熙熙躋於仁壽疊矩重規於皇聖明養老有禮百歲為期樂只君子

趙府史傳

趙府史名達字兼善越之山陰人故宋太祖之後世系備見玉牒宋社既南麟族之盛多居於越爵祿與其國

家相終始入元以來世澤湮微而以詩書守其先緒曰
谷祥者為君保翁之子提宮端四翁之孫谷祥䟽通敏
達敬賢重士生二子長即府史次名友府君生而岐嶷
秀整谷祥甚鍾愛之延師家塾教之有成以詩文自見
天性孝謹事父母未嘗有忤洪武三年谷祥謫居潁上
縣留府史兄弟應門而與府史之母俞氏偕行潁上係
今潁州為鳳陽府屬邑府史家居朝夕戀慕與其弟友
徒步二千餘里以來侍其父母辛苦給養得其歡心暇

則與縣博士太末徐景顏論經史甚見賞重縣大夫舜
江車誠則名以同鄉之故待之如親戚永嘉黃思誠倅
職潁州以為賢將辟以為吏知不可辭遂逃去既而知
潁上縣高翼強之使白事郡府不得已如鳳陽府知事
歸峽向志仁見其札翰言諸太守滑臺李漢使典簿書
府史退而嘆曰吾先代之後也可與刻木者為伍耶人
有解之者曰道德刑政本末一致學將以見諸行也孰
謂吏不可為哉勉焉從事越二年遂司刑曹鳳陽隸九

州二十六縣刑辟之多歲累千百成案之具詳審精密
凡逮捕置對繫治決斷等事所以裨贊其上者無不得
其公且平焉縉紳君子樂稱道之以為儒術吏能克世
其家云

滎陽外史曰刑所以輔治也民命之死生係焉書曰式
敬爾由獄以長我王國司其柄治其事者可以協于中
哉府史一郡吏爾而留情獄事若此庶幾以政學者乎
某為臨淮學官府史以徐博士書求見及居鳳陽吏舍

以事至府必請寓宿視為父行益恭謹至聞其論宋季事則曰東漢之禍原於黨錮宋季偽學之禁視黨錮甚矣欲不亡得乎今聖治文明堯舜之道燦然如日月之在天何幸親身見之哉此其識見超卓有出於治律明刑之外者嗚呼斯其可傳也已

孫孝子傳

母子天性也生之膝下可頃刻離哉當患難孔棘骨肉為睽固有大不幸者矣古之人君及公卿士大夫若漢

武帝宇文護周存杜羔之流皆以失母故汲汲求之也
求之得否固不能齊而人心義理之天有不可泯者夫
求而不得固為終身之憾求而得之喜慰何如哉作孫
孝子傳

孫孝子名讓字義甫世家汴梁元初有諱某者官至安
撫階鎮國上將軍守禦臨濠府遂占籍焉安撫勲名事
業不概見然濠之長老猶稱為孫安撫家云閱三世諱
允武者為安撫曾孫以功充千戶階明威將軍守禦安

慶府生二子長繼祖襲武爵次紹祖孝子大父也紹祖
生二子長德忠次德遠孝子父也元至正壬辰汝潁兵
起紹祖携二子避兵淮安昔淮安已為毛氏所據毛氏
襲青州驅孫氏一家北去使冒矢石與元兵相拒德遠
死焉孝子始生三歲侍其大父及伯父母史氏家於曹
州兵至逃遁不相顧遂失其母史氏孝子哀號不自勝
大父憐之展轉濟水間撫視益謹歲在癸卯孝子年十
餘矣思見其母不啻渴飢泣謂所親曰吾不得終事其

父未如之何也已母之存亡未可知吾不得見吾母何以生為逾年丁未為吳元年天兵下山東孝子侍其大父及伯父轉至曹州得其母於李氏懋懋弗忍舍既復業臨淮授學郡庠告之太守給告以往徒步七百餘里其母撫之而哭孝子再拜伏地嗚咽隣人皆為歔歔欲迎歸以養以李氏故未遑也既而有為之言者曰兵難之交勇夫烈士不能保其節多矣況女婦乎史氏之失節於李迫於勢不能已若孝子於母克致其情如此不謂

之孝可乎於是咸稱為孫孝子云

滎陽外史曰真嘗與修鳳陽九郡圖史古昔孝行若壽陽之董邵南李興下邳之江革匡國政浮光之丁蘭徐之荀與齡王彥成皆備書之及輯中都訪古記復得彭城華光劉審禮思貞孫棘劉平毫之夏侯佩等遺事再書不一書也獨泗州天長朱壽昌求母事與孫孝子類壽昌為名太守又得蘇軾巨筆為之發揚遂傳諸天下後世孫孝子生於帝鄉又在俊選之列異日名爵之重

安知其不與壽昌等乎

蔣節婦傳

女婦之道以不失節為貞節至於苦則其貞亦不可恒矣貞而恒恒而久久而安于其道斯亦常情之所甚難者哉真觀史傳漢烈女八人唐烈女六人而獨皇甫規妻房元齡妻鄭廉妻為最著史家叙述之公如此哉夫秉彝好德人人所同也千載之下聞家令姓女婦之節不有克如漢唐者乎作蔣氏鄭節婦傳

節婦名某字申中姓蔣氏四明郡人蔣號金紫家諱舍
之字子才之女性端嚴幼失所恃恪恭姆教年二十歸
於同郡陸某

闕

之子士元係宋太師山陰楚國公佃

之後寶謨閣待制渭南游七世孫也家室雍睦生子二
人長名公慶次名公建士元以勤學致目疾節婦鬻資
粧延名醫療之稍愈復治簡冊目遂以瞽節婦扶持調
護幾十年一日士元以隆暑患滯下而逝節婦執喪盡
禮親戚有哀其蚤寡者微意諷之節婦泣曰水不逆流

理勢然也為人婦而容再醮耶吾未亡人得奉老慈幼
不媿吾夫子於地下斯庶幾矣以死自誓親戚迺不復
言時其舅及姑某氏年已老事之甚謹未幾姑亦卒節
婦年甫三十二雛在襁抱中嬰時多難不常厥居值舅
疾復甚節婦徬徨無措而龜勉從事飲食湯藥之供未
嘗少缺舅疾既革而襄事未終復盡鬻家資以備葬而
節婦口體不給弗之恤也嘗撫其子公慶等流涕言曰
汝父以勤學喪明而殞命之不淑非學之過也汝等如

之何哉繼若父志思自樹立可矣遣就外傳旦暮覆考所業躬紡績給事師之禮際聖運肇開公慶以鄞學俊還入成均奉廷命出使未幾得請而歸與其弟公建致養今節婦年逾五十而其舅亦康寧壽考云

榮陽外史曰予觀節婦蔣氏何其不幸之甚耶既嫁而患難殷憂殆猶君子之亡也既寡而堅持自力則猶其君子之存也星霜沍移而其心冰蘖有如一曰正所謂苦節而貞久而安於其道者歟蔣氏為真母家節婦在

表外弟行故為著之如此嗚呼若節婦者豈不可為天下之為人婦者勸哉

陳本輝傳

予讀史傳兩漢循吏共十有八人唐循吏十人夫自三代以後享國之長者無如漢唐而循吏僅止此豈世運之降而人才之難也抑上之人務於苛急樂於暴戾不有以作成之耶噫何其寥濶也哉然嘗夷考其人初無奇勲異行驚駭觀聽而史冊傳之至今太史公所謂奉

法循理不求名而名自隨者若乃任司州縣為民興利如漢任延修理溝渠王景修浚儀芍陂唐常丹築堤捍江薛大鼎開渠屬海賈敦熙立堰庸水績用章章與國無窮其不謂吏之循者乎作本輝傳

陳本輝諱本以字行其先汴人名汝錫者宋建炎間扈從南渡授知越州思陵移蹕於越陞州為府就以汝錫知府事子孫遂家山陰之葛洪岩四傳入元名某字宗珍開拓基業其族益大時人目其里曰陳村又再傳而

名某字士信者儒術自持睦族二百餘口朝廷嘗徵辟
不就侍臣奏贈節義處士生四子本輝其長也次本固
次本德次本榮本輝慷慨有志操種學績文手不釋卷
少從舅氏朱興又遊既長名聲籍籍值世運中微慨然
欲以勲名自見見諸詩詠流傳縉紳間至正丙申江南
行臺御史大夫納琳岳卿奉旨徙治於越御史安居仁
求得之辟典吏曹索牘以能勤稱越二載考滿調江西
憲史考滿勅授將仕郎廣東都元帥府照磨調靜江知

事所至以治狀聞未幾內附入覲南京中書奏為江淮
行省掾洪武初元徙省治山東入朝授雷州海康知縣
郡城東阡陌犬牙相錯號萬頃田去海咫尺每颶風作
潮汐輒至禾苗湮沒農民失業宋咸淳間有堤崩塌已
久本輝建議合雷之屬縣循海築堤開河置閘時其啓
閉而蓄泄焉本輝晝夜督工彌月而成父老咸曰此百
世之利也徵陳令其至此乎縣之政大小畢舉學校公
解以次興修丹碧煥然郡誌遺缺與其鄉老討論訂証

誌以復完暇日延見諸生講習經史邑政教並行平生
不憚權要事弗合理者正言無忌尤廉謹自持海康有
德公者饋巨魚一僕者私受之本輝數日而覺召饋者
賞其直立斥去其僕人以羊續擬之方期大用以東還
道病卒年四十有七娶同邑宋宗室趙氏君王女妙觀
有賢行居家盡婦道生二子長煥次某在官常以自隨
本輝既歿煥侍母携弟以歸依其舅趙氏以居煥讀書
克承先志云

滎陽外史曰陳以國姓其世系著矣若汝錫之為守本
輝之為令祖孫相望二百餘年間可謂源遠流長也已
夫守令係國家重輕宋遭陽九之厄而天不泯其社稷
汝錫再守陪都贊治中興亦為逢時矣本輝律身修行
迪光前哲由勝國入仕新朝所宜登躋廟堂贊輔雍熙
之盛而紱綬所臨僅止一縣惜哉然以循吏之政足係
其民之思庶幾不沒矣況有煥以為之子故家文獻之
傳其有艾乎左氏載陳敬仲之占曰八世之後莫之與

京吾於陳氏深有望焉

宣節婦傳贊

女婦從一而終古何有節婦之名乎世道既降人心不古有失身改事者則全節守義斯為貴矣乃合邑方新外患狎至骨肉乖睽而欲死不死其視讎敵不容兩立矣創鉅痛深終天罔極而能報讎戮罪使生者死者兩得伸焉吾不知孰為主持而彰顯之耶作宣節婦傳
節婦名孟先姓宣氏系出魯宣伯之後世家上饒縣白

芒里父仲良讀書明律執事於公節婦幼育閨門奉家訓通孝經女誠小學書年二十有三歸同邑魏子溫子溫有賢行而節婦為之配室家雍睦內無間言及兩月草竊蜂起子溫與節婦奉其父谷章母胡氏及弟妹入靈山隱居子溫日以盜寇為虞節婦曰妾誓以一死不負君也既而強寇周率羣不逞之徒乘夜燃火炬怕首抹額執白刃突入子溫及父母與其弟子恭皆遇害節婦恐不免急引刀自刺踣地流血被體寇謂其已死不

為意怯篋取財物執其夫之妹以去歲戊戌十二月二十一日也節婦氣息奄奄有以勺飲調侍者逾一日乃蘇顧夫家荼毒殆盡哭不能作聲輿疾歸母家既愈乃曰吾志欲殄此賊念舅姑及夫暨叔暴露山谷間幸獲歸藏伸我情事則請劔司刑庶可圖也製衣具棺如死者數而剩其一人以問之則曰吾設復遇賊必死殯葬以祔吾夫可謂同穴矣以逾年己亥二月某日窀穸如禮遂列詞控訴郡府郡府以寇姓名下縣逮捕款鞠具

獄斬首以徇得夫之妹以歸多難之餘家無留貲析其田業為三二以給衣食一以供祭祀令其夫之妹既笄而嫁節婦亦年五十餘矣欽惟聖朝崇尚節義鄉進士禮部尚書徐貫道傳其事父老將上送官以旌表其門節婦流涕辭曰吾未亡人焉用此為人以是益賢之歌詩贊詠稱為宣氏節婦云

滎陽外史曰女婦柔婉之姿於患難死生若惴惴然不暇者今以宣節婦觀之剛足以自固勇足以不辱固烈

丈夫之所難哉當是時使節婦不幸斃於賊手彷徨四顧無伯叔近親則死者孰葬寃者孰雪陷者孰歸魏氏昭穆之主

闕

死而生以報讐復恥推

亡固存為心而情無不至義無不盡豈非天有以默相之耶然念百年之後無有繼者節婦亦末如之何也已昔漢皇甫規妻以罵董卓而死卓大盜劇賊非尋常暴客比威行天下不能使一婦人為之屈也斯不以見天理人心之正乎若宣節婦不死於賊而復能報賊視古

節婦何遠哉贊曰

好生惡死繫人至情我節我義不係死生患難孔殷誓
以身斃不死而生有一無二泚額谷崖有觜有骸我具
我棺以葬以埋請討復讐氣憤詞激肆諸市朝吾志既
畢竭歸奉祀蘋繁載修既歆既享求安宴遊變彼小姑
言旋言復以養以慈慰爾梵獨天性民彝往古來今不
有君子孰明其心歲月如流力云孔痺始終周旋庶曰
無媿涕淚汎瀾形隻影單照鏡淒其翩翩悲驚節苦德

貞矢言皦日申以贊詞用貽壺則

滎陽外史集卷四十六

欽定四庫全書

榮陽外史集卷四十七

明 鄭真 撰

傳

讓東耕者傳

耕所以求食也伊尹之耕有莘諸葛之耕南陽豈專求食哉夫出處隱顯殊途同歸窮而耕達而仕有道焉爾因小以明大即古以驗今取人于山林隱微間史氏之

所宜用心也作讓東耕者傳

讓東耕者姓黃氏名黼字成章淞江上海人也家於淞之東五十里鴟泥涇去涇東南二里皆廣野沃壤構屋其上瀦水為池塘環列杞柳是為耕者別業別業東二里曰黃浦通江海潮汐浦之後曰黃家渡自耕者上世居此故其地皆號黃姓云浦上有田百畝耕者之先以農起家致巨富祖某以善厚稱父某號雙清翁好學篤行刻意教子耕者遂業儒為善士其外家名仕儒學官

尤獎勵成就之松介居淞右哲人高士若龜蒙先生及
諸陸氏相接踵耕者尚志前烈不樂仕進嘗讀杜甫蜀
中諸詩有曰遺穗及衆多我倉戒滋蔓慨然歎曰杜陵
其有道者耶因號讓東耕者讓蓋蜀方言謂江水橫通
山谷處讓東在夔州赤甲白鹽間耕者相望萬里如親
歷其地東作既興耒耜錢鏹躬親先之甌窶汙邪之祝
致謹將事秋風穰稜黃雲覆隴塲圃斯築我稼既同播
而揄春以揉紅鮮玉粒熟飽數歲伏臘作苦炮羔烹羊

招邀鄰社豆籩有秩勸酬交錯歌呼鳴鳴神交夢寐儼然古人之在左右前後也天下入今職方耕者隨衆徙居潁上潁上為中都屬邑人物輻輳耕者受廬為氓勤苦自給嘗從容謂人曰是豈不如潏東也耶達人大觀物無不可士生斯時無所往而不得所樂何間彼此哉邑長車誠則名淞左名家以興學為已任尤喜薦士語耕者曰子豈久居畎畝者耶天下文明可以出而仕矣率縣博士三衢徐景顏奉幣聘為潁上學訓導弟子員

耕者勉為一出猶以潁陽之田可耕不肯食祿云贊曰
昔長沮桀溺耦而耕孔子以為天下有道丘不與易也
夫聖人未嘗有一日忘天下之心豈若辟世之士長往
不返者哉耕者以世家子當天下有道進退出處審擇
所從安義命之正其志學聖門者歟

安定郡梁安人傳

安人諱仙字某姓王氏其先家嚴之壽昌父諱某母某
氏安人生而娟好靜秀姆教婉婉聽從尤工織紵父母

愛之謂當擇良配同邑梁某伯起世儒家敦厚謹飭有古君子風遂以歸焉安人既來嬪相君子躬執婦道朝夕上堂拜舅姑禮畢退為治具飲食湯藥務適所欲好善樂施隣里貧乏者傾意周恤隨所有不計也宗姻鄉黨皆稱為賢云以明洪武八年十一月二十日卒年六十有三子男三原辰恕女一秀適鄭某先卒孫男四人輔軾連輳孫女二貞輝安人律已貞肅治家勤儉而篤於孝敬嘗曰吾庶幾無媿於為婦矣幸而有子若孫見

其成立沒齒何憾哉洪武初元朝廷新學校法壽昌有
司選舊家俊秀補弟子員夫人之次子辰執經以往學
既成試禮部中選入國學為上舍生奉上旨賜寒暑衣
分教河南之新安縣始去家時夫人流涕謂之曰殆不
復見汝矣汝好自愛辰在新一夕夢母若疾病狀驚悟
欲告歸弗得居無何計至數其屬纊日則其夢時也縣
大夫來慰唁為咨嗟者久之有解之曰周禮夢卜之官
有獻夢贈夢之禮夢有正有噩有思辰念母不置故其

疾病見於夢寐如此辰哭泣面深墨見星上道過濠梁
其友葉焱留之少憩不從則曰我情事未伸天地一罪
人耳可遲遲也耶將歸卜葬以盡始終云

滎陽鄭氏曰婦人之德不出于閨門梁安人于婦道備
矣若辰之為子遠在羈旅而夢符其死何其神也耶漢
蔡順常出外其母以客至嚙指順心動即歸而齊庾黔
婁為孱陵令父易在家遭疾黔婁忽心驚舉身流汗即
日棄官歸家蓋生之膝下一體而分疴癢疾痛彼動此

應理其宜也然蔡順黔婁皆去親不甚遠克盡其情若
辰在數千里外母在弗克盡調治之宜沒不及親棺斂
之具斯可憾也哉夫其氣志神明之交示吉凶存亡之
兆其亦可以見人之關心矣哉

貞一居士傳

昔歐陽公著五代史於一行有取焉蓋樂道人之善所
以勸後世也嗟夫史氏之用心何其微也哉洪武乙未
景彰以博學召至京師拜命州級上任如濮陽論及四

明貞一居士韓氏名鄉耆碩律身累行有足稱者因傳
之人人夫貞者正也一者誠也貞則能固一則不貳惟
貞則一一則無不貞矣非居士其孰當之哉作貞一居
士傳

貞一居士姓韓氏名常字惟善明州人世家定海縣西
曾祖清之祖祖亮皆以積善有聞父君垕號妙心居士
人稱為妙心公厚質粹容由商賈致富饒居士生而神
秀岐嶷既長威重嚴整人見而敬愛之年逾十五即以

幹蠱為任妙心公喜曰使吾家道有成者此子也事無
大小悉以委之居士承順弗懈庶弟可善自幼暨長以
及婚娶厚愛如一妙心公由定海徙郡城既奠厥居而
年漸高欲二子以生業自見面命析財各受一廛以資
贖濟人之急妙心公卒執喪過哀事母陸氏尤為孝謹
可善兩厄於災居士問撫周至值其疾病招良醫用藥
至愈乃已孝友蓋天性也少嘗讀書而通於易憂疑得
失一以決之應答如響俾子孫習之且曰天地造化之

理會於吾心至誠求之斯得矣四明道學自宋為盛慈
湖楊先生簡文靖舒先生璘置書院列諸學官居士聞
其風而慕焉助田以給祀事阿育王山藏釋迦真身舍
利歲時示見祥光炳煥居士自其先世崇奉信向膜拜
瞻禮敬承弗墜妙法蓮花經默誦精熟素衣長齋旦夕
規矩梵學釋氏以為弗及平生尤好施與有貧不能喪
者給以棺槨貧而產者資以饘粥病滯下者用秘方和
藥飲之立愈老鑿亦賴焉元至正乙未歲大侵居士建

齋天封塔寺施食以濟貧者大家多倣之定海故里以
妙心公遺命眷念不忘縣治由江入海濤浪險艱居士
擇要地建通津庵買石修治道塗作渡舟由甬東沂河
直涉其境行者便焉腴田三百畝皆靈巖鄉者弛其租
入三年故居規為義塾值兵燹廢每以為恨鄞佃人褚
姓歲入米二十石一日其家老嫗以難告盡以畀之且
為償其他逋郡城南鄮櫟社里南鄮戴某治墓隧以居
士之田大牙相入欲以他田貿易而難於言居士聞之

延諸家請如其意嘗曰吾惠不能遍及也心之所存隨所在致力焉爾居士娶朱氏婦道母儀協於壺範生二子長名懋簡次名懋和元至正間懋和以才請見知制省奏之朝授忠翊校尉慶紹等處海運所千戶以功累轉太中大夫海運都漕運正萬戶有司援例推恩二代於是居士自武德將軍溫台海運所千戶驟騎尉定海縣子進封太中大夫海運都漕運正萬戶輕車都尉高陽郡侯朱氏由定海縣君進封高陽郡夫人妙心公贈

中憲大夫海道都漕運運糧副萬戶上騎都尉追封高
陽郡伯陸氏贈高陽郡君居士既拜命燎黃山中以為
先德所致際令內附有司以戶賦之重推為糧長每歲
旅朝於京拜伏奉天殿下面聞聖諭尚局珍饌飽飫宴
賜歸語鄉黨以為千載榮遇感恩難報至於涕洟初妙
心公既逝卜地東湖盛峯山之原與陸氏合兆縉紳之
士若羽庭劉仁本長汀舒莊為著之銘詩大書勒諸棧
道揚名顯親君子稱焉嘗建精藍為思慕地僧某本同

族延以為主衣鉢食飲資以終身女兄適胡仲武生子名安道復以長女妻之後其姑婦後先以歿居士為治葬事使祔諸先麓弟可善終於別業居士痛惜之會其庶母樓氏繼亡慨然謂所親曰吾弟欲崇重所生以庶並嫡於禮經合乎否耶按孝慈錄以庶母之禮喪之皆命祔近盛峯而藏焉居士年七十有闕歷四百甲子康寧強健如一日家居無所嗜好惟購法書名畫及古彝器以資後人監觀而已嘗戒其子懋簡等曰寡慾可以

養心儉節足以裕己力勤足以奉上衣食取給不必精
華賦役克膺不宜退怠暴橫之臨靜以待之毀污之加
弗校可也於是二子懋簡懋和卒能有立懋簡嘗兩以
慶元幕長薦不就年五十闕以卒生子一人名庸庸方
娶而夭懋和以故官謫汴嘗召至吏部將用之以疾辭
令留居京師生子一人名中中子二人文童義童居士
以義童奉長子懋簡祀為庸後云贊曰

易坤之文言曰積善之家必有余慶居士承累世之舊

積擴而大之享富有之盛而崇道尚義儒釋一貫至於晚節躬際明盛入覲清光宴息從容躋於仁壽而裕及孫曾善承善繼古所謂吉人長者居士之謂乎

李元亨傳

予客中都八年於茲所見四方謫遣之士以功名自許者居多至於文武才藝足以表著於世者不可以數計也求其言行終始足以承先裕後者何其少哉作李元亨傳

李元亨鄞人先世隱德不耀父浩生元至元間好清淨之學嘗入猶龍氏之門以薦者授道判未幾棄職家居紹承宗祀人以道判公稱之娶陳氏生子名亨繼娶葉氏元亨其字也幼時道判取易卦彖辭命名元亨既冠人欲以字配之元亨曰吾父命名懼弗克當也奚以字為即名為字終其身別自號曰元齋云天性聰明多謀畧商確世務無不曲當人有求質所疑者一為剖析初感額而至者莫不心領意得以去嘗試府史同輩貪污

視財賂多寡為枉直輕重嘆曰吾不忍見也拂衣而去
教二子以禮授之諸經子史俾出就外傳朔望歸省輒
問所學逮夜躬剪燭坐聽諷誦雖不甚解而喜見顏色
郡濱海沮洳夏秋之交暑溽濕蒸人病疰及痢者相繼
元亨焚香告天按祕方貨善藥製為丸散施之輒效求
者如市每有饋遺力謝却之置田慈溪之羅江佃者於
常租外倍輸若干石元亨曰汝誤矣按籍取所當得者
餘悉還之佃者驚歎感謝有年耄耄者謂不意垂老見

此平直其於取舍蓋如此時四方多故所在調兵從容
謂其家人曰艱難懼不自保我安得如嬰兒在懷抱中
無知識者耶至正戊戌之秋得滯下疾初即安小寢度
勢不起大步登大床曰吾得正而斃焉斯已矣此吾所
自生也子能問所欲言則曰吾志氣掃地矣汝其以奉
母撫弟妹為念遂卒九月初六日也年三十有九室中
置几筵朝夕哭奠座席屏幃皆作聲人以為其靈云元
亨天性孝友道判雙目失明已久有善醫自外郡至元

亭請諸道判將延致開其瘴瘼道判曰吾先世卜葬日者言掘土有生物見陽則飛飛則地氣散矣及窆穴果見一龜兩目如燈光亟掩以土宅兆其上後有術者過其處言當出高道惜至三世無目吾今三世矣吾老將就木治目何為元亨曰使吾父復覩天日死且不憾醫至門欵洽甚恭約以厚幣相報竟不效而止道判寢卧每患口乾元亨侍問盃置珍果以資其津液夜參半聞探果碌碌有聲頗以為慰及卒奉襄如禮人稱其孝云

平生勤儉恭敬處鄉黨以誠信患難相濟惟恐不及故其亡也人為哀悼之娶江氏奉化儒族生子二人長即能次某女一人能業儒治春秋授弟子業

滎陽外史曰君子之道盡已以及人元亨庶幾矣然其以樂濟人危疾而身陷危疾以死何哉夫死生一理爾天下豈有不死之人哉和緩盧扁以術濟人生死者也而皆得疾以死其於自救何如耶彼以為其人能治是疾不當得是疾以死者斯亦惑矣若元亨之死其命也

夫雖然善必及於子孫元亨有子克報先緒天於報施之道不在茲乎

蒙古哲爾德氏家傳

昔元太祖肇基朔土蹂金蹙宋四傳至於憲宗躬事西略宮車宴駕大勲未集世祖以親王介弟入繼大統貌虎爪牙之士雲合嚮應時則有若蒙古哲爾德揚恰爾以膂力奮於行間東征南討靡役不從海寓一家行賞定功受專閫之寄傳及孫曾或以節義自著或以文學

見知可謂世德也已然而世運代更閼閼之家廢興代謝子孫不知宗派之次多矣是寧不可慨然哉作蒙古哲爾德家傳

蒙古哲爾德氏世居烏桓之北與哈塔錦氏薩察氏扎拉氏索歡氏濟喇敏氏鴻吉哩氏輝和爾氏奈曼氏克呼氏扎蘭氏斡色氏扎拉爾氏泰楚特氏珠勒根氏博都哩氏斡爾噶氏等五十三部俱號貴族宋開禧二年為金太和六年蒙古太祖號青吉斯汗即位於鄂諾河

之野以博爾珠博勒呼穆呼哩齊哩勒為腹心號為四傑時哲爾德氏亦以兵從有揚恰爾者魁岸奇偉勇猛多力善騎射居親王哈必齊麾下憲宗即位之七年帝自將侵蜀次於六盤分兵三道入揚恰爾以兵從圍宋將王堅於合州會帝崩於釣魚山歛兵而還世祖即位中統三年山東行省李壇以山東叛帝命哈必齊王總諸道兵以討之山東平宴徹以功賜羊皮聖旨蒙古改號為元至元四年阿珠受命經畧襄陽言諸哈必齊王

請以楊哈爾自近與同攻取王從之楊哈爾從阿珠以死力
自効與丞相巴延會師襄樊樊城既陷襄陽亦降分兵
圍棗陽拔之由襄陽趨郢自青山磯濟紅攻陽羅堡復
從大將順流東下敗宋師於丁家洲所向克捷遂自獨
松關入臨安以瀛國公入覲其功為多師還宣授國上
將軍淮西道宣慰使佩金虎符時至元十三年也以是
年三月十八日薨於私第訃聞帝為閔悼詔封范陽郡
侯太常定諡曰襄敏享年五十有五配鴻吉哩氏諱旺

爾封范陽郡夫人年四十有九生子一人諱布色少從
南征多獲戰功賜金束帶一佩其父元降金虎符宣授
信武將軍廬州路達魯噶齊改昭勇大將軍鎮守廬州
軍民達魯噶齊至元二十二年調昭毅大將軍鎮守池
饒棗陽萬戶府達魯噶齊以某年某月某日卒享年五
十有五配明安倫氏范陽郡夫人享年闕十次薩勒珠特
氏得年二十有九次蒙古真氏享年八十有二生子二
人長名巴拜蒙古真氏出也用其祖文職廕授承務郎

淮安路判官年六十三而卒次名壽老薩勒珠特出也宣授懷遠大將軍襲其父武職乃鎮池州年三十有三而卒巴拜娶唐古氏封宜人年五十有五而歿生子一人雅勒呼也壽老娶雅克氏封范陽郡夫人年五十有五而歿生子一名舒拉巴哈襲父爵懷遠大將軍將其軍以守禦功陞瀚東道宣慰使司都元帥至正十八年以王事終壽三十有六娶文殊努氏封范陽郡夫人無嗣且琳沁壽八十二生男一人名完前饒州路總管韓

庸愛其材舉為府吏改授臨江稅務副使以兵變隱迹
於家娶段氏生子二人長古次藍蓋自鎮國公至是四
世矣鎮國葬大明路滑州白馬縣馬村信武亦祔焉承
務以下則葬今池州某縣某山鎮國於雅勒呼為曾祖
昭武為祖承務其父懷遠父子則其從父從兄也雅勒
呼既濟世美又生承平時親見閭閻之盛折節讀書好
賢下士攘去膏粱屏遠聲色授業潘嘉多吉之門通詩
易經為進士業尤以古詩文自許挈家避地宣城士大

夫多為延譽令都督何某侯待以賓禮歸池陽別業郡
太守聞其賢置幣延入郡學訓導弟子員凡十年會朝
廷命舉文學之士以雅勒呼應詔得為從仕郎鳳陽府
六安州判官賜衣冠入謝在官逾年名聲流聞人以為
克承先烈云雅勒呼娶鄭氏生子宗岱江氏生宗道丁
氏生宗德皆岐嶷秀整修弟子業拾爾德之澤蓋未艾
云

蒙陽外史曰古稱將門有將蓋氣類使然也拾爾德氏

父子際興王之運屬橐鞬探甲冑與諸將奔走禦侮贊
成混一之功裂地受封任方面之寄傳及孫曾守正效
死可謂不失其官矣夫楚國有材晉人用之昔金日磾
以南單于子入仕漢朝七世貂蟬震赫炫燿與其國家
相終始今從事系出北部以先朝將家妙膺盛代文學
之薦向用於時如木之春所謂公侯克復其始者不在
茲乎因傳著其家世而為之贊曰

粵惟前朝興於北部豪傑景從雲龍風虎惟元帥公始

從憲宗為王先驅孰當其鋒逮事世皇仍率有衆拜命
煌煌金書綰鳳江流湯湯慨彼宋彊襄樊既拔一葦而
航維時大將如郭如李公在轅門實承器使以戰以攻
俘馘于于婉彼弱孳奉璽獻圖幕府上功公實稱最淮
海之疆十連為帥將星遽殞壽不百齡卹典之加精爽
欽承嗣子象賢人百其勇從於南征身彰錫寵乃佩虎
符金斗之墟或武或文帝命以俞載長萬夫移鎮江左
曰池曰饒式謹邊鎖貽厥孫謀閱有輝伯仲後先吹

塤吹麓武弁有我以義相讓鑾鑣鏤膺交弓虎韞迨及
四傳際時多艱羽檄星馳慨其永歎職在為臣忍違君
父伏劒一揮以備以禦自我先公有此專城義同存亡
誓死為貞力殫勢孤抗節不屈忠血之殷濺此遺紱惟
從仕公際今文明剡薦登朝服膺寵榮咸曰熙哉承務
有子四世克濟其美先隴之藏松柏蒼蒼奠祭不時南
北相望追惟教忠澤及於後有書有詩以奉悠久簪笏
在床為龍為光嗣而承之益大以昌木本水源有譜有

牒述贊有辭以示來葉

吳處士傳

昔者聖人作易於山下出泉之象曰君子以果行育德
夫行者德之著德者行之存因用以該體者也三代以
下聖賢之道微矣中世偏行之士成名立方風範足懷
者史家猶取而錄之況詩書德義有以淑諸人而傳諸
後者乎作吳處士傳

處士諱忠字彥中其先為錢唐著姓五世為鄞人有諱

安禮者入元為徽州路儒學教授轉嘉興路總管府知事其祖也諱祥甫為福建道帥府奏差則其父也妣錢氏徐氏周氏處士在幼而奏差君即世鞠於其母周少長出事外傳周旋肅恭以為讀書當見諸躬行詞章記誦奚益故其律已以嚴待人以敬宗族鄉黨並敦義讓喪葬嫁娶必力為營辦規助人以是多之性尤孝謹每以不逮事先奏差府君為恨祭祀必流涕母周疾病常不解衣帶飲食藥餌調治以時暨其歿也棺斂祭葬禮

無不至情無不備由是懿行日聞有勸之仕進者則曰
昔泰伯三以天下讓孔子稱為至德延陵季子讓國吾
聖賢之後也寧不聞風興起耶功名爵祿豈所願哉至
正間淞東戎師辟為從事不就大臣有薦者勅授紹興
路蕭山錢清巡檢亦不赴惟端居靜念保沖養和而已
士大夫家子弟有執經授業求為擊蒙者則朝夕摩勵
期於進修而止嘗作亭桃源山中萬松林立風晨月夕
鸞笙鳳竽清響迭奏從容清悟塵坌有不能入者因號

松亭處士自比於古之逸民以洪武七年十一月十七日卒享年五十娶同郡李氏生子朝宗早夭次倫次浩次潛倫明易經領洪武五年淞江行省鄉薦計偕春官選入成均引唐何蕃故事得請歸養處士既歿服闋復以明經召致闕下上親為覆試授當塗知縣文章政事有聲京畿人謂處士有子云

滎陽外史曰士有所不為亦將有所必為以其無用亦所以為用為與不為用與不用惟其時而已亞聖所謂

窮則獨善其身達則兼善天下者固其宜也處士美學
懿行推為一家之政而功名爵祿有不存焉衛詩有云
獨寐寤言永矢勿諼其處士之謂乎

吳先生傳

自孟子沒而正學不傳久矣暴秦煨燼之餘漢儒掇拾
綴葺著之詞說其果有得聖賢之心哉千百載之下向
非伊洛建安諸子出而發明羽翼之二帝三王之道泯
矣然而經學名家若歐陽生夏侯勝之流漢史猶聯編

得書況生於儒先過化之地得其緒餘有以大經學之
傳乎作吳先生傳

吳先生諱烈字義夫方齋其號也興化府莆田縣人世
家縣之黃石里曾祖諱瑤宋幼主德祐時為潮州通判
北兵至與其長子斗祥死之祖諱清太學上舍生入元
歸隱不仕引清湖灌田萬頃浙省平章烏瑪喇欲湮為
田上舍爭之在當時得不廢鄉民詞綵帳以謝者至百
數考諱栢號石亭克植先志先生年七歲失其母某氏

石亭以廣大期之年十六石亭即世先生內治家政供
賦稅樹門戶外則從師取友汲汲不遑粵昔建安之學
蔡沉仲默承文公朱子之傳著書集傳實得帝王心法
之要延祐間科舉取士定為國是先生師事郡人鄭獻
可林學矩典謨訓誥敷揚細繹通其精蘊間左大家以
書幣請教其子弟佩衿林立構臥雲精舍以居處之世
事既非豪傑分據士大夫媒取祿仕者駢肩接踵有呼
先生與俱者先生恍惚雲中報曰吾夢黃梁未熟也卒


不起聖運文明洪武初詔以三年疊試取士有司敦迫弗得已較藝閩省考官永嘉林溫奇其文置諸前列計偕京師適御史增城張公度景彞分巡中都上言帝鄉戚里學校首善之地教官缺員非所以表儀天下天官精選十有三人以先生為首遂授中立府教授即今鳳陽府也鳳陽洊罹兵燹草萊新復以耕牧樵采為事四方謫處者甘心商賈視簡冊為何物有司數數焉逼迫之始遣子弟就學先生朝夕督勵經史文藝知行兩進

登歲貢試春官者歲有其人督閩留司郡府諸州慶謝
表箋以幣請為修撰公侯大臣以下待以斯文之禮性
嚴毅以禮自持或時燕集有媒慢及誹議者則義形辭
色人以是敬憚之九年考滿進牌入覲考功書其稱職
得謝天官奏升王府官不果遂以常調授鄞縣主簿既
上任士大夫賀為得人值正旦入朝陞辭復職適官掣
弓張錢價侵欺移易者事干前官而郡之境清寺僧誣
告累及先生付剡憲置對不勝考掠遂誣服刑曹定輸


作四年放還赴大理司審錄瘐死洪武十九年某月某
日也年六十有闕適鳳陽諸生壽春陽吉評事大理為
經紀喪事賴其力先生妻陳氏遂得歸骨于里庶幾古
師弟子之誼云先生嘗三娶無子有女適同邑方某先
生嘗請告還命族子某為後不事事先生日以宗祀為
憂陳氏興化宋金紫家寓居鳳陽求之得為伉儷志於
產子逾年乃毓一女今十歲云所著有倒捕貽笑集凡
若干卷

滎陽外史曰宋李科目取士視前代為盛端平二年穆陵御延英策士五百餘名其首二卷難為進退帝躬為審定携首卷以入外廷不之知也比揭卷讀卷官定為三等以內失一卷為辭穆陵出諸袖中曰狀元在此取其辭翰兼美云及唱名乃興化吳叔吉也嗣後科第不絕為太守者五人里有萬石君家及掛籍狀元坊之號可謂盛矣予向聞先哲語及之在鳳陽與先生同為學官乃知叔吉在曾伯祖行先生自少至長卓立不羣晚

際興運而以科第為名教官出為縣倖爵位雖不大顯
亦可謂世濟其美矣彼髡頑叵測忍於構害而耳目綱
紀之司不為別白乃羅織而鍛鍊之嗚呼亦獨何心也
哉始公之赴逮也有過上饒相遇者先生語之曰為我
謝信郡鄭廣文吾不復有相見時矣予兒東昇自四明
來先生復語及之尤勤真聞訃悲傷出涕念無以為先
生出一死力者因叙其家世出處大致以告其鄉之君
子誌人物者有考焉



蒙陽外史集卷四十七



蒙陽外史集卷四十七